



Crna Gora

Ministarstvo vanjskih poslova

Generalni direktorat za ekonomsku i javnu diplomatiju

Adresa: Stanka Dragojevića 2
81000 Podgorica, Crna Gora
tel: +382 20 416 322
fax: +382 20 225 702
www.gov.me/mvp

Br:9/1-900/24-1098-16

6. decembar 2024.

PREDMET: Informacija o upućivanju humanitarne pomoći Bosni i Hercegovini

Izražavajući saosjećajnost i solidarnost sa susjednom zemljom Bosnom i Hercegovinom (BiH) u najtežim trenucima, Crna Gora potvrđuje spremnost za pružanje humanitarne pomoći i posvećenost aktivnom učešću u odgovoru na najhitnije izazove na humanitarnom planu u regionu, čime potvrđuje da je kredibilan i pouzdan partner međunarodnoj zajednici.

Obilne padavine, koje su zahvatile BiH početkom oktobra 2024. godine izazvale su poplave i klizišta u centralnom i južnom dijelu zemlje, prije svega u Neretvanskom kantonu, Centralno-bosanskom kantonu i Zenica-Doboj kantonu, što je za posljedicu imalo veliki broj stradalih i nestalih osoba. Vlada BiH je proglasila stanje elementarne nepogode, 4. oktobra 2024. godine.

Veliki broj mještana poplavljenih područja je ostao bez krova nad glavom, pa su skrovište našli u kolektivnim smještajima (sportske dvorane, škole), a neophodna će biti značajna finansijska sredstva kako bi se pogođenima poplavama pružila pomoć i zbrinjavanje. Uništena su dva staračka doma, odakle su korisnici morali biti izmješteni. Putna i željeznička infrastruktura će zahtijevati podršku i pomoć domaćih i međunarodnih aktera.

Vlada Federacije BiH je na sjednici 7. oktobra 2024. godine donijela Odluku kojom se 8. oktobar 2024. godine proglašava Danom žalosti u Federaciji BiH zbog žrtava usljed poplava i klizišta na području Federacije BiH.

Na osnovu zaključka sa vanredne sjednice Vijeća ministara BiH, pokrenute su aktivnosti traženja međunarodne pomoći putem Mehanizma civilne zaštite EU, čiji je član BiH postala prije dvije godine, kao i pomoć na bilateralnoj osnovi. Nakon što je Ministarstvo sigurnosti BiH putem Mehanizma civilne zaštite EU uputilo zahtjev za međunarodnu pomoć u saniranju poplava, odmah se odazvalo desetak zemalja regiona i EU.

Ministarstvo unutrašnjih poslova Crne Gore je uputilo tim koji je spasilačke aktivnosti sprovodio na području Jablanice i Konjica, od 7. do 11. oktobra 2024. godine, shodno procedurama i potrebama na terenu, a u saradnji sa drugim spasilačkim timovima iz regiona (Republike Hrvatske, Republike Srbije i Republike Slovenije) i BiH, i uz koordinaciju nadležnih institucija BiH. Takođe, Ministarstvo unutrašnjih poslova Crne Gore pružilo je pomoć i u vidu vreća za spavanje – 50 komada i ćebadi – 300 komada, procijenjene vrijednosti 9.000,00 eura.

Ambasada Crne Gore u Sarajevu je dopisom br. 336/2024-4 od 9. oktobra 2024. godine, obavijestila o pozivu za prikupljanje humanitarne pomoći BiH koji je upućen notom Ministarstva vanjskih poslova BiH br. 11/1-1-05-4-35532/24 od 9. oktobra 2024. godine, a koji sadrži broj žiro računa za prikupljanje sredstava na ime humanitarne pomoći stanovništvu poplavljenih područja u BiH.

Stupanjem na snagu Zakona o međunarodnoj razvojnoj saradnji i međunarodnoj humanitarnoj pomoći 20. aprila 2024. godine („Službeni list Crne Gore“, broj 34/2024), Crna Gora je stvorila pravni okvir za sprovođenje međunarodne razvojne saradnje, odnosno upućivanje humanitarne pomoći.

Shodno članu 9 Zakona o međunarodnoj razvojnoj saradnji i međunarodnoj humanitarnoj pomoći, Vlada odlučuje o upućivanju međunarodne humanitarne pomoći, na prijedlog organa državne uprave nadležnog za oblast u kojoj se upućuje međunarodna humanitarna pomoć.

U duhu solidarnosti i iskazane spremnosti za pružanje pomoći u saniranju posljedica nastalih usljed poplava u BiH, Ministarstvo vanjskih poslova predlaže upućivanje novčane pomoći BiH u iznosu od 10.000 eura, iz sredstava namijenjenih za međunarodnu razvojnu saradnju i humanitarnu pomoć u budžetu MVP.